

# No por introduci dollar na Aruba sin cumpli cu responsabilidad financiero publico

ORANJESTAD — Cu introduccion di dollar na islanan BES, e pregunta si Aruba tambe mester introduci e dollar como nos moneda tambe a lanta cabez atrobe. Tabata aña pasa caba cu ex Presidente di Banco Central Rob Henriquez a lanza e ponencia cu kizas ta ora pa Aruba tambe pasa pa dollar y laga nos florin un banda. Pa Henriquez a punto di salida tabata mas bien e debe grandi di pais Aruba y e hecho cu te ainda, ni Gobierno ni Parlamento a logra yega na un disciplina financiero necesario pa berdad baha e debe aki. Den su concepto, dolarisacion tabata e unico opcion si a caso un gobierno no ta capaz pa introduci e Fiscal Responsibility Act (FRA) pa proteha su florin. Escohenencia pa dollar ta permiti paisnan, manera islanan BES pero tambe eventual St. Maarten



y Corsow pa bira menos vulnerable pa influencia politico, unda no ta tuma e decisionnan necesario.

Ademas, hecho cu por scohe pa dolarisacion no mester keda traduci cu e otro opcion ta devaluacion di florin. E florin ta keda na mesun nivel, pero su balor, esta su poder di compra si ta baha pa motibo di tur e problemanan financiero di pais Aruba.

Aumento di prima, aumento di belasting, etc tur ta afecta poder di compra, mientras cu gobierno tin cu fia mas placa pa cubri su deficit. Di otro banda, Henriquez a reconoce si cu te hasta si kier introduci dollar como moneda di pago, Gobierno mester trece ordo den su maneho financiero y introduci un sistema di responsabilisacion financiero pa limita debe nacional.

Banco Central di otro banda ta bisa cu cambio di florin pa dollar no ta prudente na e momentonan aki. Particularmente pasobra Aruba no ta cumpli cu tur exigencia necesario pa un cambio asina y mas bien e lo por preta nos economia. Nos florin a yuda contribui na crecimiento economico, aunke cu Banco Central ta comparti e pensamiento cu deficit publico ta pone presionnan pisa.

Den concepto di Henriquez, e otro banda, ta cu unabez cu introduci dollar, Banco Central ta perde un gran parti di su funcion. Idealmente Aruba lo mester sigui cu su florin, cu ta duna mas flexibilidad pero e desaster financiero di nos pais ta excesivo y riba e punto aki, tanto e ex Presidente como e dirigencia actual di Banco Central ta comparti e mesun opinion.